


變苗圖說

特別
= 16
2436



2436

早大文庫部
昭和三十一年七月九日

黑猓羅本盧鹿在大定屬有黑白二種黑者為大姓
其人深目長身黑面鈎鼻雉髭留髯其俗尚鬼又名
羅鬼男子以青布籠髮束額若角短衣大袖著紫藍
裙其長死則均集所屬皆披甲馳馬而往祭焉以錦
緞毡衣裹尸焚於野招魂而葬之性最憨直主雖酷
虐亦不肯二善造堅甲利刃鎗鏢勁弩蓄良馬俗好
習射擊刺其兵為諸蠻魁諺云水西羅鬼擊頭掉尾
言相應也



女官即裸羅正妻稱曰耐德土務編髮為髻用青帕
蒙之多以銀絲花貼其額耳垂大環拖長裙三十六幅
其子非耐德所生不得立嗣如子幼不能主事即耐
德為女官代理土務也



白獮羅在大定安順有之與黑獮羅同而為下姓茹
毛飲血即鼠雀之物攫而燔之飲食無盤盂以三足
釜攢食死則以牛馬草裹尸而焚之居普定者名阿和





宋家苗在貴州貴陽安順二府本中華之裔春秋時
 放於夷地其言語文字悉與漢人同男子帽而長襟
 婦人笄而短襟婚姻男家遣人往迎女家率親戚以
 笙瑟擊之謂之奪親既歸旦即進盥於姑以供婦職
 喪塋飯蔬飲水三七封而識之男畊女織而多讀書
 入洋者



蔡家苗在貴筑修文清鎮威甯平遠等州縣男子衣
毡衣女則製毡為髻緣飾青布高尺許若牛角以長
簪縮之翁媳不通言居喪三月不食稻肉惟飯稗粥
猶存古禮夫死以婦殉若外家捨去則免



卡尤狝家在貴陽安順南籠平越都勻等府穿青衣
婦女以花帕蒙首衣短而下圓度身而裁嚴寒盛暑
衣無添換勾雲細摺長裙合角中以顏色相間以六
月六日為大節每歲孟春聚會未婚男女于野外跳
月歌舞以彩帶結球謂之花球意洽情鍾彼此拋球
遂婚焉貧者用牛一隻富者用牛頭數個親朋各携
鷄酒致賀祭則繞牛而哭祭畢屠牛分月羣食醉飽
各散





普籠狎家在貴陽定番廣順二州南籠安順二府以
十二月朔為大節歲時擊銅鼓以為歡若掘地而得
銅鼓即云武侯南征時所遺富者以重價爭購喪則
屠牛招戚以角飲孝子不食肉惟啖魚蝦故祭亦用
焉葬者必以傘照墓期年而後焚之其性好勇出入
帶標桿利刀倘有睚眦之仇必報近今禁戒漸循禮
法



青狎家圖說在古州清江丹江等處以青布蒙首為衣女
子色白而敏工刺繡奕棋男女拋球為樂所私者曰
馬郎夜則與之歡父母知而不禁惟避其兄弟婚媾
苟合愛者牛酒致聘不知正朔文字以木刻為信





曾竹龍家在安順府屬婦女穿白衣桶裙戴細布方
 巾以髮扎一尾名曰髮尾用猪油搽之遇親戚喜慶
 則負酒牽羊以贈并自帶新衣數套以誇富有人死
 則殮而焚之檢枯骨而葬每七月七日祭奠先瑩也

國興

國興

國興

狗耳龍家圖說在安順大定二府及廣順之康伍司有之
男子以布蒙首而不冠婦人辮髮為螺髻以布束結
于頂餘布結兩旁上形如狗耳狀衣斑衣用青色布
飾之立春後立一木杆於埜外名曰鬼杆聚未婚男
女跳月各自擇配奔後其家以牛馬贖之近今亦知
通媒致聘焉





國觀

馬澄龍家在鎮寧之谷西堡頂營司之間多有劉趙
 張等姓衣尚白喪則易之以青婦人緇布作冠若馬
 澄狀以畊種為業也





大頭龍家圖在鎮寧普定屬男子戴竹笠婦人穿土色
 青衣短裙斂馬髻雜于髮盤髻如蓋故名大頭龍家
 男女畊種為業也



花苗在貴陽大定安順遵義所屬皆無姓氏其性慤
而畏法其俗陋而力勤衣用敗布績條織成青白相
間無領袖洞其中從頭而籠下或以半幅中分交纏
于項每歲孟春擇平壤之所為月場未婚男子吹笙
女子振響鈴歌舞戲謔以終日暮則約所愛者而歸
私焉亦用媒妁聘資以女妍媸為盈縮必男至女家
成親越宿而歸惟宰牲盛饌禱于鬼雖至敗家無悔
焉



紅苗在銅仁府屬多龍吳麻白等姓衣用斑絲織成
女工以此為務若同類相鬪必致婦人往勸方解五
月寅日夫婦另宿不敢言不出戶以避鬼神而忌虎
也凡牲畜皆椎殺以火去毛微煮帶血而食之死將
所遺衣服裝成形像衆皆擊鼓名曰吊古



白苗在龍里貴定黔西所屬穿白衣男子蓬頭赤足
 婦人盤髻長簪縮髮祀祖之期必擇大牛以頭角端
 正者飼至肥聚合寨之牛聞于野勝則為吉即屠之
 以祀祖服白衣青套細摺長裙祭畢合親族飲食為
 樂也





圖說

青苗在黔西鎮寧修文貴筑等處衣尚青婦人以青
 布縮髮為髻製如九華巾男子竹笠草履情性獷悍
 今則馴良在平越者又名箐苗




黑苗在都勻八寨丹江鎮遠黎平清江古州各州府
屬族類甚衆習俗各異衣服皆尚黑男女俱跣足陟
崗巒躡荆棘其捷如猿猴性悍好鬪頭插白翎出入
必帶鏢鎗藥弩環刀自雍正十三年勦後凶性已斂
孟春各寨擇地為笙場跳月不拘老幼以竹為笙笙
長丈餘能吹歌者吹之跳舞為歡人死則生前所私
者以色錦擊竹杆插于墳前男女拜祭焉





一國

東苗在貴筑修文龍里清平清鎮及廣順各府州縣
 屬有族無姓婦人穿花衣無袖惟兩幅遮前覆後穿
 細摺短裙男子蓄頂髮短衣背甲于中秋合寨延鬼
 師以祭祖及族屬亡故者屠牛陳饌饋序而呼鬼之
 名曰祭鬼祭畢集親族暢飲盡夜每春獵于山所獲
 禽鳥必薦祖循禮守法畏官服役也





西苗有馬謝何羅雷等姓在貴陽平越二府屬娶親
必另寢私通孕產乃同宿秋收時即合眾牛于野延
善歌祀田披大寬毡衣腰間週圍細摺戴毡帽穿皮
鞋走于前童男女著青衣衫帶踏歌吹笙隨之歷三
晝夜屠牛以賽豐年名曰祭白虎性情質實畏法不
訟




天苗在平越府多姬姓性情柔順婦人工織染以仲
 冬朔為大節其在陳蒙爛土壩者緝木葉為衣著短
 裙女子笄架脩竹樓于野外未婚男子登樓吹笙而
 誘之成配人死不葬以籐蔓束之樹間待風化其尸

天苗



猥苗在永豐羅解冊亨三處原隸廣西雍正五年改
 轄黔省勤畊力作難髮穿衣俱如漢人惟婦人蒙髮
 長裙短衣不出苗俗



打牙狔狔在黔西平越清鎮所屬女子將嫁必先鑿
去門牙二齒恐妨害夫家所謂鑿齒之民也其髮梳
前披後取齊眉之意又名狔狔其種有五各分黨類
不通婚姻蓬頭赤足輕生概織毛布以一幅橫圍腰
旁無縫謂之桶裙男女同製五種皆如之





圖說

剪髮狔狔在貴定施秉平遠州屬男女皆蓄頂髮為
 髻剪去旁髮故名剪髮狔狔勤畊力作人死則積薪
 而焚之



猪屎^猓在石阡黎平古州平遠清平各屬身面不
洗其臭穢不堪與犬豕共處得獸即咋食如狼男子
出入佩刀弩有仇必報若獨力不能則備牛酒以款
有力者雖觴肉杯酒亦肯捐軀輕命或致死者納牛
償之此苗在清平能通漢語聽約束





紅狔狔在廣順平遠清平等屬親死殮以棺而不葬
置崖穴中或臨大河不施蔽蓋惟傍樹木為主



花狔狔又名狔咍苗在施秉龍泉及黃平等處男子
懶畊作而好獵以逐鹿羅雀為事婦女兩袖口繡五
綵週身銀飾間以蠶繭累累如貫珠乃古狔狔之有
五種也





水獭亦名獭 兕苗在施秉餘慶等屬善捕魚隆冬
 能入深淵不畏冷男子衣服與漢人同婦人穿細摺
 長裙婚姻喪祭俱循漢禮知法畏官





同規

鍋圈狔狔在平遠州男子自織紡以斜文布為衣婦
人以青帕籠髮如鍋圈狀青布短裙病者不服葯用
虎頭一個飾以綵線置簸箕內延鬼師禱之性嗜酒勤

于農





披袍犵狁在黃平州男女衣長尺許外被一袍前短
 後長鑿竅為桶裙羊毛織成性淳謹勤畊作多鑄犁

口營生



狝獠苗有王黎金文等姓散居各府縣冬則掘地為
爐火卧以牛羊皮簾無被蓋祭鬼用草札一龍舡上
插五色紙旗往郊外祭之遇時節則歌以為歡在都
勻清平者衣服與漢人同親死有斬衰而無苴經長
子居喪七七之內分沐浴不踰戶如長子居貧不
能守或以長孫次子代遵節制教訓綦嚴子孫多有
入泮者





犵獐苗在荔波縣男子善畊作婦人工紡織著短衣短
 裙僅以遮膝親死不置棺反以歌唱用木板殮而停
 之及葬子女哭必出血守墳三日而返





楚人在普安州各營司男女皆披毡衣垢不沐浴性質
而佞佛凡猓羅狎家等苗言語不相諳者常令楚人

通之





蠻人在新添丹江男子披草蓑婦人著青衣短裙喪
葬宰牛歌舞性獷悍好漁獵以十二月晦為節祭鬼
今在思南之沿河司有丹家蠻俗類相同





土人在貴陽廣順與軍民通婚姻男多貿易女勤畊
 種時田歌音清越可聽歲首打鑼擊鼓以唱神歌所
 至之家與飲食在邛水者最好聞今則還淳





猺人在貴定清平獨山黔省原無雍正年間自粵遷
來居傍溪間以樹皮接續規水畊作之餘入山採藥
沿寨行醫風俗謹厚見遺不拾





峒人多在黔省下游冬採茅花為絮以禦寒飲食避
鹽醬夫婦出入必偶在石阡朗溪司者頗類漢人在
洪州者性稍貪好於遺物





楊保苗在遵義龍泉婚用媒妁喪葬祭亦有悲思哀
悼之情但性原獷凡官司差役持訊抗拒不出惟聽其
鄉老決之





狎獷苗在都勻黎平石阡及施秉龍里龍泉府縣有
 文楊張石歐等姓男子計口而畊女子度身而織暇
 則漁獵為事婚喪牽犬




九股苗在興隆凱里與黑苗同類此種因武侯征剿
之餘僅存九人遂稱九股苗散處蔓延地廣族繁性
强悍出入長戴鐵盔前有護面後有遮肩身披鐵甲
及臍下用鐵線圍身鐵皮纏腿健者左手持木牌右
手持鏢桿利刃其走如飛攜帶強弓硬弩名曰偏架
三人共弓一張矢發則無不貫自雍正十年勦撫搜
繳甲兵建城而安汎焉



八番苗在定番州男女衣服與漢人同其俗女勤男
逸日出而畊日入而織獲稻和稅儲之剡木作臼臨
炊始取稻把入臼手舂之凡宴會擊長腰鼓為歡以
十月晦日為大節親死塋而擇期夜靜而出不使吾
親知之



黑脚苗在清江台拱地方男子短衣大褲頭插白翎
 出入三五成羣持鏢帶刀以搶劫為能凡作事用螺
 螯二個置于盆中觀其相鬥以下吉凶每多應驗平
 日搶獲歸婦人夫死不能再嫁如男不行搶劫者有
 女則不嫁之今亦知法畏官矣



黑樓苗在清江八寨有之鄰近諸寨于高坦處造一
樓高數層名為聚堂用一木杆長丈餘空中懸于層
頂名長鼓凡有不平之事即登樓擊之各寨相聞俱
帶長鏢利刃齊至樓下聽寨長判之有事之家備牛
酒如有事而擊鼓不到者罰牛以作公用



短裙苗都勻八寨有之男子穿短衣寬褲婦人穿短
衣無襟袖前不護肚後不遮腰不穿褲其裙只長五
寸許極厚而細摺聊以蔽羞而已採紫草以營生酒
醉則常卧於山凹隆冬浴于溪澗且云可以助暖



尖頂苗在貴陽府屬男女皆梳尖頭髻以仲冬朔為大節夫婦耦畊力作也

因親



郎慈苗在威寧州屬其俗更異婦女產子夫必在房
中守不踰門戶彌月方出產婦出畊作措飲食以供
夫除乳兒外日無暇刻父母將死俟氣初絕時將親
首扭令相背謂曰好看後人今則此俗漸息矣

圖說





圖說

羅漢苗在八寨丹江有之男子戴狐尾披髮于後最敬
 彌勒佛每三月三日男女携食物供佛歌舞三日不
 食煙火似有寒食之意



谷蘭苗在定番有之性慄悍善擊刺出入攜帶利刃
鏢弩諸苗皆畏之今亦男畊女織其布精細諺云欲
作汗衫褲須得谷蘭布婚姻亦用媒妁



陽洞羅漢苗在黎平府屬男子畊作貿易女人髻髮
散縮挿木梳于額富苗以金銀作連環耳墜衣短而
繫雙帶結于背胸前刺繡一方以銀器飾之係長裙
短褲或長裙無褲能養蚕織綿其髮數日必沃愛潔
淨此苗蠻中難得者也




克孟牯羊苗在廣順州之金筑司擇懸岩鑿竅而居
高者百仞構竹梯上下畊者不用牛用錢鑄代犁耨
而不芸男女跳笙而偶生子免懷後始歸親死不哭
反笑舞浩歌謂之闌死次年聞杜鵑鳥聲則舉家號
哭曰鳥猶時至親不復來



箐苗居依山箐洞苗類也在平遠州不善治田惟種
菽麥稗梁為食男女衣服均自織製





獨家苗在天柱錦屏二縣所屬擇平坦近水而居以種
 棉花為務男子衣服與漢人同故多與漢人傭工女人
 戴藍布角巾著花邊衣裙織洞帕頗精美能通漢語聽

約束





矜家苗在荔波縣于十月晦日祭鬼為節男女俱以
藍花帕蒙首未婚者其帕稍長每仲冬未婚男女相
聚歌舞所歡者約而奔之及生子後方歸母家名曰
回親始用媒而過聘焉





圖說

洞家苗在荔波縣衣長不過膝歲首雜魚肉酒飯以祭
 盤瓠擇近水而居善種棉花女則自紡織男子雖通漢
 語不識文字以木刻為信



狄家苗在荔波縣自雍正十年由廣西撥轄于黔之
都勻府男子漁獵女人紡織故有狄家布之名穿桶
裙短衣四圍俱以花布綴之每歲首男女成羣連袂
歌舞相歡者遂成婚焉





洗

六額子在大定府威寧州二屬有黑白二種結尖頂
 髻婦女衣長無裙親死時葬亦用棺踰年後卜吉延
 親族至墓前以牲酒致祭發墓開棺取枯骨刷洗以
 白為度用布裹骨復埋過一二年仍取骨而洗洗七
 次為率遇家人有病則曰祖先之骨不潔淨也仍取
 而再洗所謂洗骨苗是也近今禁誠此俗漸止





白額子在永豐羅斛有之男子梳尖頭頂髻如螺螄
 穿白衣男子衣短女子衣長不穿裙其俗與六額子
 同類病者但祝鬼而不用藥



丹家蠻在思南府之沿河司此種喜漁獵得魚蝦如美
食俗與蠻人同焉


思南





九名九姓苗在獨山州性狡而多悍每多假捏名姓
 喪葬婚事宰牛聚飲醉必相鬧受傷者納牛以講和
 婦女以種山為務俗與紫苗同





爺頭苗在下遊古州有之與洞苗類相同皆黑苗也
性喜鬥畊不用牛以鉄犁人為之以冬月朔為節婦
人編髮為髻近圈以銀絲扇樣冠子縮之以長簪琵琶
或雙環耳墜項圈數圍穿短衣以五色錦鑲邊袖
姑之女必適舅之子為室聘禮本不能措則取償於
子孫倘外室無相當子弟抑或無子姑有女子必重
賄於舅謂之外甥錢姑女方許另配若無錢賂於舅
者姑之女終身不敢嫁也



洞菟苗在古州以同羣同類分為兩寨居住大寨者
名爺頭居住小寨者名洞菟洞菟每聽爺頭使喚婚
姻各分寨類若小寨與大寨結親謂之犯上而大寨
知之則聚黨類盡奪其產或致傷人善舟楫



八寨黑苗在都勻府屬性獷悍女子以色布鑲衣袖
胸前繡錦一方護之謂曰遮肚寨內另造一房名曰
馬郎房晚來未婚之女相聚其所歡悅者以牛酒致
聘出嫁三日即歸母家或一年半載外氏向婚者索
頭錢倘壻無力給錢或不與則將女子改嫁有婚女
皆死者向其子索謂之鬼頭錢也



清江黑苗男子以布束髮項戴銀圈大耳環墜寬褲
子男女皆跣足廣種樹木與漢人通商往來稱曰同
年愛穿戲箱錦袍漢人多買舊袍賣之以獲倍利未
婚男子稱曰羅漢女子稱曰老倍春日晴和携酒食
于高崗男歌女和情悅愛者椎牛置酒以牛角飲之
而苟合男子生子後乃曰有後人方事畊作也



樓居黑苗八寨丹江有之男子畊種性剛而憨婦人
羊角髻愛居樓人死殮而停之以二十年期合寨共
卜吉以百棺同葬公建祖祠名曰鬼堂其地什物毫
不敢犯犯者不祥最信鬼而愛養牲畜人居樓畜養
樓下也



黑山苗在抬拱古州清江三屬以藍布束額居深山
 窮谷之中不事畊作每以擄掠為生能下茅草卦預
 知吉凶今則寧戢矣

國朝





黑生苗在清江所屬情性凶惡訪富戶所居則邀約
 惡黨執火長鏢持刀而劫自雍正十三年征服今亦
 守法也



高坡苗又名頂板苗在平遠黔西等屬穿青衣喜種
 山林婦女以木尺綰髮內故名頂板苗也婚姻苟合
 婦人紡織惟勤





平伐苗在貴定之新添營男子披草衣著短裙婦人
衣短穿補裙以長簪綰髮為髻婚姻祭享俱用犬也



黑狎家在清江所屬以廣植樹木為業其寨多富漢
人在內往來熟識可以求鄰近富戶作保出樹木為
本合願生理或借貸經商無不應付倘不能如期納
還不妨直告其故即致虧折可再行添借倘被人掣
騙不能出外追討則訪原保祖坟掘取骨骸揀紅旗
而去謂之松白放黑使原保之子孫拘查掣騙之人
追借項贖取骨骸所有鄰近坟墓常招其害今則設
以保甲此風息矣



清江狎家在台拱有之婦人勤畊男子頭纏紅布腰
佩大刀聚党出寨捉拿路過孤客將長木為枷枷於
寨內索取財物名曰贖身錢如不給者終不能脫身
多有受其害近今嚴懲不敢為矣




里民子在貴陽黔西大定清鎮等處男子貿易為生
婦人穿細耳草鞋勤儉力畊餘閑時則紡織羊毛布
作永愛養牲畜常帶入山歲節與漢人同之



白兒子在威寧及滇省有之有宗族男子多漢人風
女人猶苗俗多因漢人籍贅苗女為家生子後有仍
然歸漢故有子母而無父故名曰白兒子也



白龍家在大定平遠二處穿白衣入山採漆售于市
凡物皆背負婚喪頗循儀禮



白狎家在荔波縣男子頭戴狐毛以畊種為業女子身
小而多慧穿淡藍色衣著細摺雲裙紅綉花鞋項戴
銀圈五色布褲每孟春擇平壤之所以大木一具空
其中名曰巴槽男子各執竹片擊巴槽响声類擊鼓
名曰打鑼又曰同耍男女抱腰相戲父母在旁觀而
不禁有漢人能通苗語者亦可與焉未婚之苗女子
故多與漢人往來名曰外郎俟女正配有夫酬以苗
布一二足謂曰斷禮不得再往來也





土狔狔男子披草為衣專與猓羅僱工每以油燒熟
 搯足故入山如猿猴也此類住威寧州屬





鴉雀苗在貴陽府所屬穿白衣鑲胸袖及裙邊最喜
 居山種雜糧食擇高山為佳壤其言語似雀教故名
 鴉雀苗有事在官惟聽鄉老之言也

國興





葫蘆苗在定番羅斛二處性凶暴連羣聚黨專以搶劫不事畊作今法嚴亦守分矣

同撰





國興

洪州苗在黎平府男子與漢人同勤儉畊作女子善
紡織棉葛布頗精細多售于市故有洪州葛布之名也





西溪

西溪苗在天柱縣屬女子穿裙不過膝以青布纏腿未
婚男子全女子携簋相聚而戲愛者約飲于野外歌
舞苟合生子以牛過聘焉

西溪

祥雲

車寨苗在古州男子多藝業女工針黹未婚者于野曠之
 所為月場男女歌聲俱美與諸苗不全相悅者自行配
 合亦名跳月此種乃馬三保之兵落六百名招贅苗女為家
 室故眾稱曰六百戶之生苗也



圖說



生苗在台拱凱里黃平施秉等屬多野性所食皆生
物即魚肉亦以微熟為鮮故名生苗也





